

摛藻堂四庫全書薈要

史部

欽定四庫全書叢要

史部

宋史卷一百五十八



詳校官編修臣王天祿

欽定四庫全書  
會要卷五千七百八十六

史部

宋史卷一百五十八

元中書右丞相總裁托克托等修

選舉志第一百十一

選舉四銓法上

太祖設官分職多襲五代之制稍損益之凡入仕有貢舉奏牘攝署流外從軍五等吏部銓惟注擬州縣官幕職兩京諸司六品以下官皆無選文臣少卿監以上中

書主之京朝官則審官院主之武臣刺史副率以上內職樞密院主之使臣則三班院主之其後典選之職分為四文選曰審官東院曰流內銓武選曰審官西院曰三班院元豐定制而後銓注之法悉歸選部以審官東院為尚書左選流內銓為侍郎左選審官西院為尚書右選三班院為侍郎右選於是吏部有四選之法文臣寄祿官自朝議大夫職事官自大理正以下非中書省勅授者歸尚書左選武臣升朝官自皇城使職事官自

金吾階衛仗司以下非樞密院宣授者歸尚書右選自  
初仕至州縣幕職官歸侍郎左選自借差監當至供奉  
官軍使歸侍郎右選凡應注擬升移叙復廕補封贈酬  
賞隨所分隸校勘合格團甲以上尚書省若中散大夫  
閣門使以上則列選叙之狀上中書省樞密院得畫旨  
給告身凡選人階官為七等其一曰三京府判官留守  
判官節度觀察判官即後來承直郎其二曰節度掌書記觀察  
支使防禦團練判官即後來儒林郎其三曰軍事判官京府留

宋史

守節度觀察推官即後來其四曰防禦團練軍事推官文林郎

軍監判官即後來其五曰縣令錄事參軍即後來從事郎從政郎

其六曰試銜縣令知錄事即後來修職郎

其七曰三京軍巡判官司理戶曹司戶法曹司法參軍主簿縣尉即後來從政郎

人須三任六考用奏薦及功賞廼得升改凡改官留守

兩府兩使判官進士授太常丞舊亦授正言監察或餘太常博士後多不除

人太子中允舊亦授殿中丞支使掌書記防禦團練判官進士

授太子中允或書郎餘人著作佐郎兩使推官軍事判官

令錄事參軍進士授著作佐郎餘人大理寺丞初等職  
官知縣知錄事參軍防禦團練軍事推官軍器監判官  
進士授大理寺丞餘人衛尉寺丞惟判司主簿縣尉七  
考進士授大理寺丞餘人衛尉寺丞自節察判官至簿  
尉考不及格者遞降等凡非登科及特旨者年二十五  
方注官凡三班院二十以上聽差使初任皆監當次任  
為監押巡檢知縣凡流外人三任七考有舉者六員移  
縣令通判有班行舉者三員與磨勘凡進納人六考有

職官或縣令舉者四員移注四任十考有改官者五人舉之與磨勘初定四時參選之制凡本屬發選解並以四孟月十五日前達省自千里至五千里外為五等日期離本處若違限及不如式本判官罰五十直錄事參軍本曹官各殿一選諸州四時具員闕報吏部踰期及漏誤判官罰七十直錄事參軍以下殿一選在京百司發選解及送闕違期亦有罰諸歸司官奏年滿俟勅下準格取本公司文解赴集流外銓則據其人自投狀申奏

亦依四時取解參選凡州縣老疾不任事者許判官錄事參軍糺舉以聞判官錄事參軍則州長吏糺之藩郡監牧每遣朝臣攝守往往專恣太祖始削外權命文臣往蒞之由是內外所授官多非本職惟以差遣為資歷建隆四年詔選朝士分治劇邑以重其事大理正奚嶼知館陶監察御史王祐知魏楊應夢知永濟屯田員外郎于繼徽知臨清常參官宰縣自此始舊制畿內縣赤次赤畿外三千戶以上為望二千戶以上為緊一千戶

以上為上五百戶以上為中不滿五百戶為中下有司請據諸道所具板圖之數升降天下縣以四千戶以上為望三千戶以上為緊二千戶以上為上千戶以上為中不滿千戶為中下自是注擬以為資敘又詔周廣順中應出選門州縣官於南曹投狀準格敕考校無礙與除官其敘復者刑部檢勘送銓先是選格未備乾德二年命陶穀等議凡拔萃制舉及進士九經判中者並入初等職官判下者依常選初入防禦團練軍事推官軍

事判官者並授將仕郎試校書郎周三年得資即入留守兩府節度推官軍事判官並授承奉郎試大理評事又周三年得資即入掌書記防禦團練判官並授宣德郎試大理評事兼監察御史周二年得資即入留守兩府節度觀察判官並授朝散大夫試大理司直兼監察御史周一入同類職事諸府少尹又周一年送名中書門下仍依官階分為四等已至兩使判官以上次任入同類職事者加檢校官或轉運憲銜凡觀察判官以

上緋十五年乃賜紫每任以周三年為限閏月不預每周一年校成一考其常考依令錄例書中上公事闕遺曾經殿罰者即降考一等若校成殊考則南曹具功績請行酬獎或考滿未代更一周年與成第四考隨有罷者不赴集其奏授職事書校考第並準新格參選自是銓法漸有倫矣帝又慮銓曹惟用資歷而才傑或湛滯乃詔吏部取赴集選人歷任課績多而無闕失其材可副升擢者送中書引驗以聞時仕者愈衆頗委積不可

遣開寶初令選人應格者到京即赴集不必限四時及成次甲又給限南曹八日銓司旬有五日門下省七日自磨勘注擬及點檢謝詞總毋逾一月若別論課績或負過名須考驗行遣如法及資考未合注擬者不在此限三年詔曰吏多難以求其治祿薄未可責其廉與其冗員重費不若省官益奉州縣官宜以戶口為率差減其員舊奉月增給五千西川管內諸州凡二萬戶依舊設曹官三員戶不滿二萬置錄事參軍司法參軍各一

員司法兼司戶不滿萬戶止置司法司戶司戶兼錄事  
參軍戶不滿五千止置司戶兼司法及錄事參軍縣千  
戶以上依舊置令尉主簿凡三員戶不滿千置令尉縣  
令兼主簿事戶不滿四百止置主簿尉以主簿兼知縣  
事戶不滿二百止置主簿兼令尉諸道減員亦倣此制  
西川官考滿得代更不守選嶺表初平上以其民久困  
苛政思惠養之令吏部銓自襄荆以南州縣選見任年  
未五十者移為嶺南諸州通判得携族之官以廣南偽

署官送學士院試書判稍優則授上佐令錄簿尉初州  
縣有闕員差前資官闕 帝以其紊常制令所在即上

闕員有司除注又謂諸

闕

官或著吏能悉令罷去良

可惜也有司按其歷任三攝無曠敗者以名聞六年從  
流內銓之請復四時選而引對者每季一時引對之時  
國家取荆衡克梁益下交廣闢土既遠吏多闕是以歲  
常放選選人南曹投狀判成送銓依次注擬其後選部  
闕官即特詔免解非時赴集謂之放選習以為常而取

解季集之制漸廢是冬迺命參知政事盧多遜等以見行長定循資格及泛降制書乃正違異削去重複補其闕漏參校詳議取悠久可用者為書上之頒為永式而銓綜之職益有叙矣先是選人試判三道其二全通而文翰俱優為上一道全通而文翰稍堪為中三道俱不通為下判上者職事官加一階州縣官超一資判中依資判下入同類惟黃衣人降一資至是增為四等三道全次文翰無取者為中下用舊判下格全不通而文翰

又純繆為下殿一選太平興國六年詔京朝官除兩省  
御史臺自少卿監以下奉使從政於外受代而歸者令  
中書舍人郭贊膳部郎中兼侍御史知雜事滕中正戶  
部郎中雷德驤同考校勞績論量器材以中書所下闕  
員擬定引對以遣謂之差遣院蓋前代朝官自一品以  
下皆曰常參官其未常參者曰未常參官宋目常參者  
曰朝官祕書郎而下未嘗參者曰京官舊制京朝官有  
員數除授皆云替某官或云填見闕京官皆屬吏部每

任滿三十月罷任則歲校其考策取解赴集太祖以來  
凡權知諸州若通判若監臨物務官無定員月限既滿  
有司住給奉料而見釐務者牒有司復文所釐務罷則  
已但不常參注授皆出中書不復由吏部至是與朝官  
悉差遣院主之凡吏部黃衣選人始許改為白衣選人  
太宗選用庶僚皆得引對觀其敷納可采者超擢之復  
慮因緣矯飾徼幸冒進廼詔應臨軒所選官吏並送中  
書門下考其履歷審取進止舊制州縣官南曹判成流

內銓注擬其職事官中書除授然而歷任功過須經南  
曹考驗遂令幕府官罷任並歸銓曹其特除拜者聽朝  
旨又詔獄官闕繫尤重新及第人為司理參軍固未精  
習令長吏察視不勝任者奏判司簿尉對易其官淳化  
四年選人以南郊赦免選悉集京師帝曰並放選則負  
罪者幸矣無罪者何以勸乃令經停殿者守常選又詔  
司理司法參軍在任有犯遇赦及書下考者止與免選  
更勿超資工部郎中張知白上言唐李嶠嘗云安人之

方須擇郡守朝廷重內官輕外任望於臺閣選賢良分  
典大州共康庶績鳳閣侍郎韋嗣立因而請行遂以本  
官出領郡今江浙州郡方切擇人臣雖不肖願繼前修  
帝曰知白請重親民之官良可嘉也然不允其請淳化  
以前資叙未一及是始定遷秩之制凡制舉進士九經  
出身者校書郎正字寺監主簿助教並轉大理評事評  
事轉本寺丞任太祝奉禮郎者轉諸寺監丞諸寺監丞  
轉著作佐郎或特遷太子中允祕書郎由大理寺丞轉

殿中丞由著作佐郎轉祕書監丞資淺者或著作郎優遷者為太常丞由太子中允祕書郎轉太常丞三丞著作皆遷太常博士轉屯田員外郎優者為禮部工部祠部主客由屯田轉都官優者為戶部刑部度支金部都官轉職方優者為吏部兵部司封司勲其轉郎中亦如之左右司員外郎太平興國中有之後罕除者左右司郎中惟待制以上當為少卿者即為之由前行郎中轉太常少卿祕書少監由此二官轉右諫議大夫或祕

書監光祿卿諫議轉給事中資淺者或右轉左給事中  
轉工部禮部侍郎至兵部吏部轉左右丞由左右丞轉  
尚書自侍郎以上或歷曹或超曹皆繫特旨諸科及無  
出身者校書郎正字寺監主簿助教並轉太祝奉禮郎  
太祝奉禮郎轉大理評事評事轉諸寺監丞諸寺監丞  
轉大理寺丞大理寺丞轉中舍優者為左右贊善資淺  
者為洗馬由幕職為著作佐郎者轉太子中允由中允  
贊善中舍洗馬皆轉殿中丞殿中丞轉國子博士

舊除  
五經

者至春秋博士則轉由國子博士轉虞部員外郎優者  
國子博士後罕除

為膳部由虞部轉比部優者為倉部由比部轉駕部優  
者為考功或由水部轉司門司門轉庫部為郎中亦如  
之至前行郎中轉少卿監或一轉或二三轉即為諸寺  
太卿監自太卿監特恩獎擢或入給諫焉其為臺省官  
則正言監察比太常博士殿中司諫比後行員外郎起  
居侍御史比中行員外郎起居轉兵部吏部員外郎侍  
御史轉職方員外郎優者為兵部司封知制誥由正言

以上至郎中皆敘遷兩資中行郎中為左右司郎中若  
其次醻勞有遷三資或止一資者至左右司郎中為知  
制誥若翰林學士者遷中書舍人舊亦有自行郎中  
除者後兵吏部止遷諫議由中書舍人轉禮部以上侍郎入丞郎即越一資以  
上內職學士待御史中丞由諫議轉者遷工部侍郎由  
給事轉者遷禮部侍郎由丞郎改者約本資焉其學官  
司業視少卿祭酒視太卿其法官大理正視中允贊善  
凡正言監察以上皆特恩或被舉方除其任館閣三司

王府職事開封府判官推官江淮發運諸路轉運使提點刑獄皆得優遷或以勤效特獎者亦如之兩制龍圖閣三館皆不帶御史臺官樞密直學士三司副使皆不帶御史臺官及兩省官待制以上不帶少卿監其內職自借職以上皆循資而遷至東頭供奉官者轉閣門祗候閣門祇候轉內殿崇班崇班轉承制承制轉諸司副使自副使以上或一資或五資七資或直為正使者至正使亦如之至皇城使者轉昭宣使昭宣使轉宣慶使

宣慶使轉景福殿使其閣門祇候特恩轉通事舍人通事舍人轉西上閣門副使亦有加諸司副使兼通事者西上閣門副使轉東上東上轉引進引進轉客省客省轉西上閣門使自此以上亦如副使之遷惟至東上者又轉四方館使客省使轉內客省使內客省使轉宣徽使或出為觀察使自內客省使以上非特恩不授武班副率以上至上將軍其遷歷軍衛如諸司使副焉由牧伯內職改授則觀察使以上為上將軍團練使閣門使

以上為大將軍刺史諸司使至崇班為將軍閣門祇候  
供奉官為率殿直以上為副率內侍省入內內侍省自  
小黃門至內供奉官皆歷級而轉至內東頭供奉官轉  
內殿崇班有轉內侍常侍者內常侍亦正轉崇班其銓  
選之制兩府司錄次赤令留守兩府節度觀察判官少  
尹一選兩府判司兩畿令掌書記支使防禦團練判官  
二選諸府司錄次畿令四赤簿尉軍事判官留守兩府  
節度觀察防禦團練軍事推官軍監判官進士制舉三

選諸府司理判司望縣令九經四選輔州大都督府司  
理判司緊上州錄事參軍緊上縣令次赤兩畿簿尉五  
經三禮三傳三史通禮明法五選雄望州司理判司中  
州錄事參軍中縣令次畿簿尉六選緊上州司理判司  
下州中下州錄事參軍中下縣下縣令緊望縣簿尉學  
究七選中州中下州司理判司上縣簿尉八選下州司  
理判司中縣簿尉九選中下縣下縣簿尉十選太廟齋  
郎室長通理九年郊社齋郎掌坐通理十一年凡入官

則進士入望州判司次畿簿尉九經入緊州判司望縣  
簿尉五經三禮通理三傳三史明法入上州判司緊縣  
簿尉學究有出身人入中州判司上縣簿尉太廟齋郎  
入下州判司中縣簿尉郊社齋郎試銜無出身人入下  
州判司中下縣簿尉諸司入流人入下州判司下縣簿  
尉仁宗初吏員猶簡吏部奏天下幕職州縣官期滿無  
代者八百餘員而川廣尤多未代帝曰此豈人情之所  
樂耶其亟代之帝御後殿視事或至旰食中書請如天

禧舊制審官三班院流內銓日引見毋得過兩人詔弗  
許自真宗朝試身言書判者第推恩迺特詔曰國家詳  
覈吏治念其或淹常選而以四事程其能朕承統緒循  
用舊典爰命從臣精加詳考其令翰林學士李諮與吏  
部流內銓以成資闕為差擬於是咸得遷官率以為常  
後議者以身言書判為無益迺罷凡磨勘遷京官始增  
四考為六考舉者四人為五人曾犯過又加一考舉吏  
各有等數得被舉者須有本部監司長史按察官乃得

磨勘須到官一考方許薦任凡選人年二十五以上遇  
郊限半年赴銓試命兩制三員鑠試于尚書省糊名謄  
錄習辭業者試論試詩賦詞理可采不違程式為中格  
習經業者人專一經兼試律十而通五為中格聽預選  
七選以上經三試至選滿京朝官保任者三人補遠地  
判司簿尉無舉主者補司士參軍或不赴試亦無舉者  
永不預選京官年二十五以上歲首赴試于國子監考  
法如選人中格者調官兩任無私罪而有部使州守倅

舉者五人入親民舉者三人惟與下等釐物務官初州  
郡多闕官縣令選尤猥下多為清流所鄙薄每不得調  
乃詔吏部選幕職官為知縣又立舉任法以重令選勅  
諸路察縣之不治者然被舉者日益衆有司無闕以待  
之中書奏罷舉縣令法未幾有言親民之任輕則有害  
於治法不宜廢復令指劇縣奏舉舉者二人必一人本  
部使既居任復有舉者始得遷否則如常遷母輒升補  
常參官已授外任勿奏舉然銓格煩密府史姦弊尤多

而磨勘者待次外州或經三二歲乃得改官往往因緣  
薄勞求截甲引見有詔自是弗許神宗欲更制度建議  
之臣以為唐銓與今選殊異雜用其制則有留礙煩紊  
之弊始刊削舊條務從簡便因廢南曹而併歸之于銓  
初審官西院與東院對掌文武尋改從吏部而左右選  
分焉祖宗以來中書有堂選百司郡縣有奏舉雖小大  
殊科然皆不隸于有司暨元豐罷奏舉闕屬之銓曹而  
堂選亦不領於中書一時更制必欲公天下而詒永久

於是除免選之恩重出官之試定賞罰之則酌資廕之宜凡設試以待命士而入之銓注者自廕補銓試之外有進士律義武臣呈試及試刑法官等而銓試所受為特廣中書言選人守選有及三年方遇恩放選者或適歸選而遽遇恩既為不均且蔭補免試注官以不習事多失職試者又止試詩豈足甄才已受任而無勞績舉薦及免試恩法須再試書判三道然亦虛文熙寧四年遂定銓試之制凡守選者歲以二月八月試斷按二或

律令大義五或議三道後增試經義法官同銓曹撰式  
考試第為三等上等免選注官優等升資如判超格無  
出身者賜之出身自是不復試判仍去免選恩格若歷  
任有舉者五人自與免試注官任子年及二十聽赴銓  
試其試不中或不能試選人滿三歲許注官惟不得入  
縣令司理司法任子年及三十方許參注若干年及二十  
授官已及三年出官亦不用試若秩入京朝即展任監  
當三年在任有二人薦之免展選人應改官必對便殿

舊制五人一引不過二人至是待次者多有踰二年乃得引帝閔其留滯詔每甲引四人以便之帝因諭郡守謂宰臣曰朕每思祖宗百戰得天下今州郡付之庸人常切痛心卿輩謂何如而得選任之要文彥博請擇監司而按察之陳升之曰取難治劇郡擇審官近臣而責以選才宜可得也初置審官西院磨勘武臣並如審官院格而舊審官曰東院御史中丞呂公著言英宗時文臣磨勘例展一年至少卿監止武臣橫行以上及使臣

猶循舊制固未嘗如文臣有所節抑也又仁宗時嘗著令正任防禦團練以上非邊功不遷今及十年嘗歷外任即許轉亦未如少卿監之有限止也詔兩制詳定王珪等言文武兩選磨勘已皆均用四年請今自正任刺史以上轉官未滿十年若有顯效者自許特轉其非次恩惟許改易州鎮以示旌寵有過則比文臣展年從之知審官西院李壽朋言皇城使占籍者三十餘員多領遙郡而尚得從磨勘遷刺史團練防禦使每進一級增

奉錢五萬廩粟雜給如之實為無名請於皇城使上別置二使名視前行郎中量給奉祿其遙郡刺史團練防禦使並從朝廷賞功擢用更不序遷詔遙郡刺史團練防禦使並以十年磨勘至觀察留後止應官止而有功若特恩遷者不以法諸司使副每磨勘皆用常制雖軍功亦無別異而閣門內侍輩轉皆七資帝謂左右近習非勲勞而得超躐至嘗立功者乃無優遷非制也使副嘗有軍功應轉許特超七資閣門通事舍人帶御器械

兩省都知押班管幹御藥院使臣七資超轉法皆除之  
後客省引進四方館各置使二員東西上閣門共置使  
六員客省引進閣門副使共八員副使磨勘如諸司使  
法使有關改官及五期者樞密院檢舉歷閣門職事有  
犯事理重者當遷日除他官閣門四方館使七年無私  
過未有闕可遷者加遙郡特旨與正任者引進四年轉  
團練使客省四年轉防禦使皆著為定制焉先是御史  
乞罷堂選曾公亮執不可王安石曰中書總庶務今通

判亦該堂選徒留滯不能精擇宜歸之有司帝曰唐陸贊謂宰相當擇百官之長而百官之長擇百官今之審官苟得其人安有不能精擇百官者哉元豐四年堂選堂占悉罷初有司屬職卑者不在吏銓率命長吏舉奏都水監主簿李士良言沿河幹集使臣凡百六十餘員悉從水監奏舉往往不諳水事干請得之迺詔東西審官及三班院選差於是悉罷內外長吏舉官法明年令吏部始立定選格其法各隨所任職事以入仕功狀循

格以俟擬注如選巡檢捕盜官則必因武舉武學或緣  
舉薦或從獻策得出身之人他皆倣此自官制行以舊  
少卿監為朝議大夫諸卿監為中散大夫祕書監為中  
大夫故事兩制不轉卿監官每至前行郎中即超轉諫  
議大夫前行郎中於階官為朝請大夫諫議大夫於階  
官為太中大夫帝謂磨勘者古考績之法所與百執事  
共之而禁近獨超轉非法也於是詔待制以下並三年  
一遷仍轉朝議中散中大夫三官自是遷敘平允凡開

府儀同三司至通議大夫無磨勘法太中大夫至承務郎皆應磨勘待制以上六年遷兩官至太中大夫止承務郎以上四年遷一官至朝請大夫止朝議大夫以七十員為額有闕以次補之選人磨勘用吏部法遷京朝官則依新定之制除授職事官並以寄祿官品高下為法凡高一品以上者為行下一品者為守二品以下者為試品同者不用行守試哲宗時御史上官均言今仕籍合文武二萬八千餘員吏部逆用兩任闕次而仕者

七年乃成一任當清其源宜加裁抑朝廷下其章議之  
司諫蘇軾議曰祖宗舊法凡任子年及二十五方許出  
官進士諸科初命及已任而應守選者非逢恩不得放  
選先朝患官吏不習律令欲誘之讀法乃減任子出官  
年數去守選之格槩令試法通者隨得注官自是天下  
爭誦律令於事不為無補然人人習法則試無不中故  
蔭補者例減五年而選人無復選限吏部員今年已用  
後四年夏秋闕官冗至此亦極矣宜追復祖宗守選舊

法而選滿之日兼行試守之科此亦今日之便也事報聞三省言舊經堂除選人惟嘗歷省府推官臺諫寺監長貳郎官監司外悉付吏部銓注凡格所應入遞升一等以優之被邊州軍其城砦巡檢都監監押砦主防巡諸路捕盜官及三萬緡以上課息場務凡舊應舉官員闕許仍奏舉時通議大夫以上有以特恩磨勘轉官而比之舊格或實轉兩官至三四官者右正言王覲謂非所以愛惜名器請官至太中大夫以上毋用磨勘遷轉

詔待制太中大夫應磨勘者止於通議大夫餘官止中  
散大夫中散以上勞績酬獎合進官者止許回授予孫  
特命特遷不拘此制初武臣戰功得賞凡一資則從所  
居官遞遷一級於是以上皇城使驃上遙刺或入橫行且  
閣門使以上等級相比而輕重絕遠因樞密院言乃詔  
閣門左藏庫副使得兩資客省皇城使得三資止許一  
轉減年者許回授親屬又小使臣磨勘轉崇班者歲母  
過八十人內臣昭宣使以上無磨勘法惟押班以上則

取裁餘理五年磨勘紹聖初改定銓試格凡攝官初歸選散官權官歸司若新賜第皆免試每試者百人惟取一人入優等中書奏裁二人為上等五人為中等崇寧以後又復元豐制而蔭補者須隸國學一年無過罰乃試銓若在學試嘗再入等即免試其公私試嘗居第一得比銓試推恩政和間著為令既而臣僚言進士中銓格者每二百人得優恩不過五七人又或闕上等不取而朝廷取隸國子試格用之銓注及今五年而得上等

優恩者二百四十人免試者尚在其外是蔭補隸學者  
優於累試得第之人矣於是詔在學嘗魁一試者許如  
舊恩餘止令免試注官吏部侍郎彭汝礪乞稍責吏部  
甄別能否凡京朝官才能事效苟有可錄尚書暨郎官  
銓擇以聞三省分三年考察之高則引對次即試用下  
者還之本選若資歷舉薦應入高而才行不副許奏而  
降其等凡皆略許出法而加升黜歲各毋過三人初選  
人改官歲以百人為額元祐變法三人為甲月三引見

積累至紹聖初待次者二百八十餘人詔依元豐五日而引一甲甲以三人歲母過一百四十人俟待次不及百人別奏定又令歷任通及三考而資序已入幕職令錄方許舉之改官吏部言元豐選格經元祐多所紛更於是選集後先路分遠近資歷功過悉無區別踰等超資惟其所欲詔旨既復元豐舊制而辟舉一路尚存請盡復舊法以息僥倖乃罷辟舉崇寧元年詔吏部講求元豐本制酌以時宜刪成彙格使才能闊闊兩當其實

吏部言堂選窠名及舉官員閼內外共約三千餘目元祐法選人得升資以上賞及參選射闕不許遣人代注今皆罷從元豐法所當損益者其知邊近蠻夷州如威茂黎瓊等及開封府曹掾平準務諸路屬官在京重課場務京城內外廂官戶部幹官麴院榷貨務將作監管幹公事黃河都大內外榷茶官凡干刑獄及筦庫繁劇皆不可罷舉若御史臺主簿檢法官協律郎豈可泛以格授諸如此類仍舊辟舉從之惟諸路毋得直牒差待

闕得替官權攝初未改官制大率以職為階官如以吏部尚書為階官而同中書門下平章事則其職也至於選人則幕職令錄之屬為階官而以差遣為職名實混淆甚矣元豐未及革正崇寧二年刑部尚書鄧洵武極言之遂定選人七階曰承直郎曰儒林郎曰文林郎曰從事郎曰通仕郎曰登仕郎曰將仕郎政和間改通仕為從政登仕為修職將仕為廸功而專用通仕登仕將仕三階奏補未出官人承直至修職須六考廸功七考

有官保住而職司居其一乃得磨勘坐愆犯則隨輕重  
加考及舉官有差時權姦柄國僥倖並進官員益濫銓  
法留礙臣僚言吏員增多蓋因入流日衆熙寧郊禮文  
武奏補總六百一十一員元豐六年選人磨勘改京朝  
官總一百三十有五員考之吏部政和六年郊恩奏補  
約一千四百六十有畸選人改官約三百七十有畸欲  
節其濫惟嚴守磨勘舊法而今之磨勘有局務減考第  
有川遠減舉官有用酬賞比類有因大人特舉有託事

到闕不用滿任有約法違礙許先次而改凡皆棄法用  
例法不能束而例日益繁苟不裁之將又倍蓰而未可  
計也請詔三省若吏部舊有止法自當如故餘皆毋得  
用例迺詔惟川廣水土惡地許減舉如制餘悉用元豐  
法既而又言元豐進納官法多所裁抑應入令錄及因  
賞得職官止與監當該磨勘者換授降等使臣仍不免  
科率法意深矣迺者用兵東南民入金穀皆得補文武  
官理選如官戶與士大夫涇渭並流復其戶不受科輸

是得數千緡於一日而失數萬解於無窮也况大戶得復則移其科於下戶下戶重貧州縣緩急責辦何人此又弊之大者不聽初宗室無參選法祖宗時間選注一二不為常制徽宗欲優宗室多得出官一日參選即在合選名次之上而膏梁之習往往貪恣出任州縣贖貨虐民議者頗陳其害欽宗即位臣僚復以為言始令不注郡守縣令仍與在部人通理名次高宗建炎初行都置吏部時四選散亡名籍莫攷始下諸道州府軍監條

具屬吏寓官之爵里年甲出身歷仕功過舉主到罷月  
日編而籍之然自兵難以來典籍散失吏緣為私申明  
繁苛承用踳駁保住滋衆阻會無期參選者苦之迺令  
凡文字有不應於今而按牘參照明白從郎官審覆長  
貳予決小不完者聽行有徇私挾情則令御史糾之又  
詔京畿京東河北京西河東士夫在部注授雖銓未中  
而年及者皆聽注官二年命京官赴行在者令吏部審  
量非政和以後進書頌及直赴殿試之人乃聽參選在

部知州軍通判僉判及京朝官知縣監當以三年為任  
者權改為二年以赴調者萃東南選法留滯故也又詔  
州縣久無正官者聽在選人申部審度榜闕差注紹興  
元年起居郎胡寅言今典章文物廢墜無幾百司庶府  
不無闕者莫如吏部姑置侍郎一員郎官二員胥吏三  
十人則所謂磨勘封敘奏薦常程之事可按而舉矣詔  
曰六官之長佐王理邦國者其惟銓衡乎亂離以來士  
大夫流徙有徒跣而赴行在者注授榜闕姦弊日滋寒

士困苦甚可憫焉宜令三省議除其弊嚴立賞禁仍選能吏以主之御史臺常加糾察於是三省立八事曰注擬藏闕申請徵幸去失艱難刷闕減裂闕會淹延審量疑似給自邀求保明退難令長貳機梶之又詔館職選人到任及一年通理四考並自陳改京官二年呂頤浩言近世堂除多侵部注士人失職宜倣祖宗故事外自監司郡守及舊格堂除通判內自察官省郎以上館職書局編修官外餘闕并寺監丞法寺官六院等武臣自

準備將領正副將以上其部將巡尉指使以下並歸部  
注從之又復文臣銓試以經義詩賦時議斷案律義為  
五場願試一場者聽榜首循一資武臣呈試合格者並  
聽參選三年右僕射朱勝非等上吏部七司敕令格式  
自渡江後文籍散佚會廣東轉運司以所錄元豐元祐  
吏部法來上乃以省記舊法及續降指揮詳定而成此  
書先是侍御史沈與求言今日矯枉太過賢愚同滯帝  
曰果有豪傑之士雖自布衣擢為輔相可也苟未能致

其實不若姑守資格廻命吏部注授縣令惟用合格之人五年詔凡注擬並選擇非老疾及未嘗犯贓與非緣民事被罪之人時建議者云親民莫如縣令今率限以資格雖貪懦之人一或應格則大官大邑得以自擇請詔監司郡守條上劇邑遴選清平廉察之人為之既而又詔知縣依舊法止用兩任關升通判資序明年侍御史周秘言今有無舉員考第因近臣薦對即改官升擢實長奔競望詔大臣自今惟賢德才能之人餘並依格

注擬廷臣或請以前宰執所舉改官易以司馬光十科  
之目歲薦五員中書難之詔前宰執所舉京削不理職  
司而已三十二年吏部侍郎凌景夏言國家設銓選以  
聽羣吏之治其掌於七司著在令甲所守者法也今升  
降於胥吏之手有所謂例焉長貳有遷改郎曹有替移  
來者不可復知去者不能盡告索例而不獲雖有強明  
健敏之才不復致議引例而不當雖有至公盡理之事  
不復可伸貨賄公行姦弊滋甚嘗覩漢之公府有辭訟

比尚書有決事比比之為言猶今之例今吏部七司宜置例冊凡換給之期限戰功之定處去失之保任書填之審實奏薦之限隔酬賞之用否凡經申請或堂白或取旨者每一事已命郎官以次擬定而長貳書之于冊永以為例每半歲上于尚書省仍關御史臺如是則巧吏無所施而銓叙平允矣有議減任子者孝宗以祖宗法令難於遽改令吏部嚴選試之法自是初官毋以恩例免試雖宰執亦不許自陳回授舊制任子降等補文

學及恩科人皆免至是悉試焉凡未經銓中及呈試者  
勿堂除雖墨敕亦許執奏舊制宗室文資與外官文臣  
參注窠闕武資則不得與武臣參注但注添差至是始  
聽注釐務闕七年始命銓試不中年四十呈試不中年  
三十者令寫家狀讀律注官陳師正言請令宗室恩任  
子弟出官日量行銓試如士夫子弟之法多立其額而  
優為之制遂詔自今宗室曾經應舉得解者許參選餘  
並行銓試三人取二其三試終場不中人聽不拘年限

調官淳熙元年參知政事龔茂良言官人之道在朝廷則當量人才在銓部則宜守成法法本無弊例實敗之法者公天下而為之者也例者因人而立以壞天下之公者也昔之患在於用例破法今之患在於因例立法謠稱吏部為例部今七司法自晏敦復裁定不無疎略然守之亦可以無弊而徇情廢法相師成風蓋用例破法其害小因例立法其害大法常斬例常寬今法令繁多官曹冗濫蓋緣此也望令裒集參附法及乾道續降

申明重行欽定非大有抵牾者弗去凡涉寬縱者悉刊  
正之庶幾國家成法簡易明白賦墨之姦絕冒濫之門  
塞矣於是重修焉既而吏部尚書蔡沈以改官奏薦磨  
勘差注等條法分門編類名吏部條法總類十一月七  
司敕令格式申明成書淳熙三年中書舍人程大昌言  
舊制選人改秩後兩任關升通判兩任關升知州  
知州兩任即理提刑資序除授之際則又有別以知縣  
資序隔兩等而作州者謂之權發遣以通判資序隔一

等而作州者謂之權知上而提刑轉運亦然隔等而授  
是擇材能也結銜有差是參用資格也今得材能資格  
俱應選者為上其次則擇第二任知縣以上有課績者  
許作郡初任通判以上許作監司第二任通判以上許  
作職司庶幾人法並用從之寧宗慶元中重定武臣關  
升格先是初改官人必作令謂之須入至是復命除殿  
試上三名南省元外並作邑後又命大理評事已改官  
未歷縣人並令親民一次著為令紹定元年臣僚上言

銓曹之患員多闕少注擬甚難自乾道嘉定以來嘗命選部職官窠闕各於元出闕年限之上與展半年用闕歷年寢久入仕者多即今吏部參注之籍文臣選人武臣小使臣校尉以下不下二萬七千餘員大率三四人其注一闕宜其膠滯壅積而不可行乞命吏部錄參司理司法令丞監當酒官於元展限之上更展半年從之七年監察御史陳垓建言乞申戒飭銓法十弊一曰添差數多破法耗財謂倅貳幕職參議機宜總戎鈐轄監押之類二曰抽差員

泉州縣廢職謂監司帥守幕屬多差三曰攝局違法蠹

政害民謂監司帥守徇私四曰須入不行徼幸撓法謂

差權幕屬等職

見任州縣他官權攝

改官人必作知縣今多規免苟圖京局蹣五曰奏辟不

求倅貳遂使不曾歷縣之人冒當郡寄六曰奏辟不

應奔競日甚謂在法未經任人不許奏辟今或以初任或以闕次遠而改辟見次者

六曰

改任巧捷紊亂官常謂在法已授差遣人不得干求換易今既授是官復謀他職辭卑居

尊棄彼七曰薦舉不公多歸請託八曰借補繁多官資就此

泛濫九曰瘞曠職守役心外求十曰匿過居官翫視國

法謂曾經罪犯必俟赦宥今則既舊制軍功補授之人遭彈劾初未經赦者經營差遣

自合從軍非老疾當汰無參部及就辟之法比年諸路  
奏功不實寅緣竄名許令到部及諸司紛然奏辟實礙  
銓法建炎兵興雜流補授者衆有曰上書獻策曰勤王  
曰守禦曰捕盜曰奉使其名不一皆閫帥假便宜承制  
之權以擅除擢有進士徑補京官者有素身胥名即為  
郎大夫者乃詔從軍應賞者第補右選以清流品又有  
民間願習射者籍其名姓守令月一試取藝優者如三  
路保甲法區用紹興初嘗以兵革經用不足有司請募

民入貲補官帝難之參知政事張守曰祖宗時授以齋郎今之將仕郎是也知樞密院季回曰此猶愈科率於民乃許補承節郎承信郎諸州文學至進義副尉六等後又給通直郎修武郎秉義郎承直至迪功郎其注擬資考磨勘改轉蔭補封叙並依奏補出身法毋得注令錄及親民官和議之後立格購求遺書亦命以官凡歿於王事無遺表致仕格法者聽奏補本宗異姓親子孫弟姪文臣將仕郎武臣承信郎餘親上州文學或進武

校尉所以褒恤忠義也又以兩淮荆襄其土廣袤募民  
力田凡白身勸民墾田及七十五頃者與副尉五伯頃  
補承信郎孝宗即位命帥臣監司郡守嘗任兩府及朝  
官等遣親屬進貢等第補授登仕郎將仕郎推恩理為  
選限淳熙三年詔罷鬻爵除歉歲民願入粟賑饑有裕  
於衆聽補官餘皆停自是進納軍功不理選限登仕郎  
諸州助教不許出官止於贖罪及就轉運司請解而已

宋史卷一百五十八

欽定四庫全書

會要卷五千七百八十七

史部

宋史卷一百五十九

元中書右丞相總裁托克托等修

選舉志第一百十二

選舉五銓法下

遠州銓補蔭

流外補

川峽閩廣阻遠險惡中州之人多不願仕其地初銓格  
稍限以法凡州縣幕職每一任近即一任遠川峽廣南

及沿邊不許挈家者為遠餘悉為近既分川峽為四路廣南東西為二路福建一路後增荆湖南一路始立八路定差之制許中州及土著在選者隨意就差名曰指射行之不廢太平興國初選人孟巒擬賓州錄事參軍詣匦訴冤坐流海島自是得遠地者不敢辭既而詔川峽嶺南福建注授計程外給兩月期違則本州不得放上遣送闕下除籍不齒或被疾則所至陳牒長吏按驗付以公據廢痼未損則條狀以聞雍熙四年又詔選人

年六十勿注遠地非土人而願者聽凡任廣蜀福建州  
縣並給續食初嶺南閼官往往差攝至是詔州長吏試  
可者選用之罷秩奏送闕下與出身淳化間又詔嶺南  
攝官各路惟許選二十員以承乏餘悉罷歸始令嶺南  
幕職許攜族行受代不得寄留至道初申詔斂南州縣  
官不得以族行敢有妄稱妻為女奴攜以之官除名初  
榮州司理判官鄭蛟冒禁攜妻之任會蜀賊李順構亂  
其黨田子宣攻陷城邑而蛟捕得之擢為推官至是知

梓州張雍奏其事上命戮蛟而有是詔咸平間以新恩循梅四川瘴地選荆湖福建人注之吏部銓擬官悉標其過犯自是凡注惡地令不須書又詔規避遐遠違期受代勘鞫責罰就移遠地神宗更制始詔川陝福建廣南之官罷任迎送勞苦其令轉運司立格就注免其赴選於是八路自常選知州而下轉運司置員闕籍具書應代時日下所部郡衆示之凡見任距受代半年及已終更者許用本資序指射有司受而閱之定其應格當

差者上之審官東院流內銓審覆如令即奏聞降勅若  
占籍本路或游注此州皆從其便惟不許官本貫州縣  
及隣境其參擬銓次悉如銓格無願注者上其闕審官  
而在選者射之武臣之屬西院三班院者令樞密院放  
此具制後荆湖南亦許就注或言土人知州非便法應  
遠近迭居而川人許連任本路常獲便家實太偏濫王  
安石曰分遠近均勞佚也中州士不願適遠四路人樂  
就家便用新法即兩得所欲况可以省吏卒將迎官府

浮費邪何正臣又言蜀人之在仕籍者特衆今自郡守而下皆得就差一郡之官土人大半察案吏民皆其鄉里親信難於徇公易以合黨請收守令閑歸之朝廷而他官兼用土人量立分限庶經久無弊兼聞差注未至盡公願許提刑司索案牘究察之奏上法不為改但申嚴提刑司互察之法元祐初御史上官均言定差不均之弊有七諸路赴選中試乃差八路隨意取射一也諸路吏部待試需次率及七年方成一任八路就注若及

七年已更三任二也八路雖坐停罷隨許射注其待次者又許權攝祿無虛日而吏選無愆犯亦大率四年方再得祿四也土人得射奏名者免試就注家便年高力憊不復望進往往營私廢職五也仕久知識既多士人就射本路不無親故請託六也八路監司地遠而專設漫滅功過名次人亦不敢爭校故有力者多得優便而孤寒滯却七也請併八路差盡歸吏部為便既而吏部亦請用常格差除遂悉歸之銓紹聖復行舊制且許八

路人廕補出官即轉運司試中注闕重和間臣僚又言其弊轉運以軍儲吏祿供饋支移為已責而視差注為末務往往付之主案吏胥定擬而簽廳視成書判而已注闕之高下視賄之厚薄無賂則定差之牘脫漏言詞隱落節目及其上部必致退却參會重上又半歲矣以是闕多而不調者衆宜督典領之官歲終取吏部退難有無多寡為之課而賞罰之庶可公注擬而絕吏賂乃命立考課法建炎初詔福建二廣闕並歸吏部惟四川

仍舊制初累朝以廣南地遠利入不足以資正官故使舉人兩與薦選者試刑法於漕司以合格者注攝兩路謂之待次攝官更兩任無過則錫以真命至是雖歸之吏部踰年無願就者復歸漕司自神宗朝宗室不許調川陝官至是宗室多避難入蜀乃聽於四路注擬六年詔川陝轉運司每季孟月上旬集注為定法焉八年直學士院勾龍如淵上疏謂行都去蜀萬里而比歲寢闕歸之朝廷寒遠之士困抑者衆願參酌前制稍還漕銓

之舊立為定格使與堂除不相侵紊遂命以小郡知州  
監以下仍付漕司差注其選人改官詣司公參理為到  
部人稱便焉

補蔭之制凡奏戚屬太皇太后皇后本服期親

奉禮郎大功守監簿小功初等幕職官

元豐前試大理評事總麻

知令錄

元豐前試校書郎

異服親亦如之有服女之夫則本服

大功以上女夫知令錄小功判司主簿或尉總麻試監

簿周功女之子知令錄孫及大功女之子判司主簿或

尉曾孫及大功女之孫小功女之子並試監簿其非所  
生子若孫各降一等總麻女之子試監簿每祀南郊誕  
聖節太皇太后皇太后並錄親屬四人皇后二人非遇  
推恩而特旨賜官不用此法凡諸妃期親守監簿餘判  
司主簿或尉異姓親試監簿婉容以上有服親才人以  
上小功親並試監簿凡太長公主長公主公主夫之期  
親判司主簿或尉餘試監簿子補殿中丞孫光祿寺丞  
婿太常寺太祝外孫試銜知縣凡親王婿大理評事外

孫初等職官女之子婿試監簿宗室總麻以上女之夫試銜知縣袒免判司主簿或尉其願補右職依換官法奉禮郎即右侍禁幕職官即左班殿直知令錄即右班殿直判司主簿尉即奉職試監簿即借職凡文臣三公宰相子為諸寺丞期親校書郎餘親本宗大功至總麻服者以屬遠近補試銜使相參知政事樞密院使副使宣徽使子為太祝奉禮郎期親校書正字餘親補試銜節度使僕射尚書太子三少御史大夫文明殿學士資政殿大學

士子校書郎正字期親寺監主簿餘親試銜三司使翰  
林資政殿侍講龍圖閣學士樞密直學士太常宗正卿  
中丞丞郎留後觀察使內客省使子正字期親寺監主  
簿餘親試銜及齊郎兩省五品龍圖閣直學士待制三  
司副使知雜御史子寺監主簿期親試銜餘親齊郎諸  
司大卿監子寺監主簿期親試銜小卿監兼職者子試  
銜期親齊郎凡武臣宰相子為東頭供奉官使相知樞  
密院子為西頭供奉官期親皆左侍禁餘屬自左班殿

直以下第官之樞密使副使宣徽節度使子西頭供奉  
官期親右侍禁餘屬自右班殿直以下第官之六統軍  
諸衛上將軍節度觀察留後觀察使內客省使子右侍  
禁期親右班殿直餘屬三班奉職以下第官之客省使  
引進防禦使團練使四方館使樞密都承旨閣門使子  
右班殿直期親三班奉職餘屬為差使殿侍諸衛大將  
軍內諸司使樞密院諸房副承旨子三班奉職期親借  
職餘屬為下班殿侍諸衛將軍內諸司副使樞密分房

副承旨子為三班借職凡兼職在館閣校理檢討王府  
記室翊善侍講三司主判官開封府判官推官江淮發  
運諸路轉運始許奏及諸親提點刑獄惟許奏男其嘗  
以贓抵罪得復故官文臣至郎中及員外郎任館閣職  
武臣至諸司副使諸衛將軍者止許廕子若孫一人尚  
在謫籍者弗預太祖初定任子之法臺省六品諸司五  
品登朝嘗歷兩任然後得請始減歲補千牛齊郎員額  
齊郎須年貌合格誦書精熟乃得奏太宗踐極諸州進

奏者授以試銜及三班職初推恩授散試官者不得赴選太平興國二年乃詔授試銜等人特定七選集歲為定令凡誕聖節及三年大祀皆聽奏一人而淳化改元恩文班中書舍人武班大將軍以上並許廕補如遇轉品許更蔭一子由是奏薦之恩始廣每誕聖節朝臣多請奏疏屬不報至道二年始限以翰林學士兩省五品尚書省四品以上賜一子出身此聖節奏薦例也先是任子得攝太祝奉禮未幾即補正員帝謂膏梁之子不

十年坐致閨籍是年悉授同學究出身赴選集真宗東  
封祀汾陰進奉人已官者進秩未官者令翰林試藝與  
試銜齊郎借職公主郡縣主以下諸親外命婦入內者  
亦有恩慶而東封恩則提點刑獄朝臣使臣皆得奏一  
人奏戚屬舊無定制有求補閣門祇候者真宗以宣贊  
之職非可以恩澤授乃詔自今求叙遷者至殿直止大  
中祥符二年以門廩授京官年二十五以上求差使者  
令於國學受業及二年審官院與判監官考試其業及

以名聞內諸司使副授邊任官者陞辭時許奏子詔樞密院定其制凡妄名孫及從子為子求蔭者坐之七年帝幸南京詔臣僚逮事太祖者賜一子恩澤令翰林學士李維等定自給諫觀察使以上得請初轉運使辭日許奏一人天禧後惟川廣福建者聽餘路再任始得奏又詔承天節恩例所蔭子孫不許以他親及已食祿者特許西京分司官郊裡奏廕一子自是分務西洛者得以為例南京則否仁宗慶歷中裁損奏補入仕之路凡

選人遇郊赴銓試其不赴試亦無舉者永不預選罷聖  
節奏膺恩學士以下遇郊恩得奏大功以上親再遇郊  
得奏小功以下親郎中帶職員外郎初遇郊蔭子若孫  
再郊及期親四遇郊聽蔭大功以下親初得奏而年過  
六十無子孫蔭期親其皇親大將軍以上妻再遇郊亦  
許之武臣蔭例倣此凡蔭長子孫皆不限年諸子孫須  
年過十五若弟姪須過二十必五服親乃許已嘗蔭而  
物故者無子孫祿仕聽再蔭自是任子之恩殺矣英宗

即位郡縣致貢奉人悉命以官知諫院司馬光建言監司太守遣親屬奉表京師不問官職高下親屬近遠推恩至班行幕職權知州軍或所遣非親亦除齋郎及差使殿侍此蓋國初承五代姑息藩鎮之弊因循不革爵祿本待賢才今此等受官誠為太濫縱不能盡罷其人若五服內親等第授以一官其無服屬量賜金帛庶少致濫官之失然詔令已行不從其議時方患官冗言者皆謂由三歲一磨勘其進甚亟易至高位故獲蔭者衆

乃令待制以上自遷官後六歲無故則復遷之有過益  
展年至諫議大夫止京朝官四歲磨勘至前行郎中止  
少卿監限七十員員有闕以前行郎中久次者補之少  
卿監以上遷官聽旨仁宗雖罷聖節恩而猶行之妃主  
神宗既裁損臣僚奏蔭以宮掖外戚恩尤濫故稍抑之  
舊諸妃遇聖節奏親屬一人間一年許奏二人郊禮許  
奏一人嬪御每遇郊奏一人兩遇聖節與一奏後定諸  
妃每遇聖節并郊許奏有服親一人淑儀充儀婕妤貴

人遇郊許奏小功以上親一人位號別而資品同者許比類奏薦舊公主每遇聖節郊禮奏夫之親屬一人公主生日許奏一人後罷生日恩所奏須有服親皇親妻兩遇郊許奏期親一人後罷奏舊郡縣主遇郊許奏親生子右班殿直若庶子及其夫之親兩遇郊許奏借職一人後親子惟注幕職孫若庶子兩遇郊方許奏一人夫之親屬勿奏舊臣僚之妻為國夫人者得遺表恩後除之妃嬪公主以下非有服親之婿不許奏既而曾布

等又言臣僚陳請恩澤宜有定制乃許見任二府歲乞  
差遣一人宰臣樞密使兼平章事因事罷者陳乞轉官  
一人指射差遣二人餘執政官並各一人待制以上乞  
差遣遷學士者又一人三路廣桂安撫使知成都府梓  
州差遣一人親孫子循一資廣南轉運提點刑獄奏子  
孫或期親合入官一人成都梓利夔路差遣一人子孫  
循一資中書檢正官樞密院檢詳官至員外郎在職及  
二年遇大禮許補親屬中書堂後官提點五房官雖未

至員外聽奏補邕宜欽極邊烟瘴知州聽奏子孫一人  
凡因戰陣物故及歿於王事許官其子孫又功臣繪像  
之家如無食祿人則許特奏子孫一人入官既定銓試  
法任子中選者得隨銓擬注其入優等往往特旨賜進  
士出身元祐元年詔諸軍致仕停放入其遺表恩該及  
子而遇五年自陳者慮有冒濫毋推恩職事官卿監以  
下應任子者須官至朝奉郎乃許奏三年定宰臣執政  
初遇郊許奏本宗異姓親各一人次遇郊奏數如初願

用其恩與有官人則許轉官并循資或乞差遣惟不得  
轉入朝官循入支掌應奏承務郎殿直以上許換升一  
任不得升入通判餘官三遇郊許奏有官人舊制應奏  
兩人止者次郊止許奏有官人其後遇郊更合補蔭者  
並準此為間隔之次已致仕而遇大禮應奏補者再奏  
而止宣仁太皇太后諭輔臣曰近已裁減入流本家恩  
澤宜減四分之一呂公著等曰陛下臨朝同聽斷本殿  
恩澤自不當限數先求所定止與皇太后同等豈可更

損宣仁曰裁減恩澤凡自上而始則均一矣乃詔曰官冗之患實極于今苟非裁入流之數無以清取士之原吾以眇身率先天下今後每遇聖節大禮生辰合得親屬恩澤並四分減一皇太后皇太妃同之哲宗既親政詔復舊凡乞致仕而不願轉官者中大夫至朝奉郎及諸司使許奏補本宗有服親一人自奉議郎內殿承制以下許與有服親一人恩例惟中大夫中散大夫諸司使帶遙郡者蔭補外仍與有服親恩例若致仕未受勅

而身亡者在外以陳乞至門下省日在京以得旨日亦  
許乞有服親恩例一人初任子法以長幼為序若應奏  
者有廢疾或嘗犯私罪至徒或不肖難任從仕許越奏  
其次至是始刪去格令長幼為序四字五年定親王女  
郡主蔭補法遇大禮許奏親屬一人所生子仍與右班  
殿直兩遇奏子或孫與奉職即用奏子孫恩廻授外服  
親之夫及夫之有服親者有官人轉一官毋得升朝選  
人循一資無官者與借職湏期以下親乃得奏吏部言

皇太妃遇大禮以應奏恩與其親屬而服行不應法詔  
用皇后總麻女之子為比補借職舊法母后之家十年  
一奏門客而太妃未有法紹聖初詔皇太妃用興龍節  
奏親屬恩廻授門客自是太后每及八年太妃十年奏  
門客一名與假承務郎許參選如年數未及凡恩皆母  
回授元符後命婦生皇子許依大禮奏有服親三品以  
上三人宗室總麻親許視異姓蔭孫凡蔭補異姓惟執  
政得奏如簽書樞密院事雖依執政法而所蔭即不理

選限後因轉官礙止法者許回授未仕子孫而貪冒者  
又請回授異姓有司每沮止之然亦多御筆許特補政  
和間尚書省定回授格謂無官可轉或可轉而官高不  
欲轉或事大而功效顯著為一格許奏補內外白身有  
服親官有止法不可轉功績次著為一格許奏本宗白  
身袒免親官不甚高而功績大為一格許奏本宗白身  
有服親官不甚高功不甚大為一格而分為三一與內  
外有官有服親一與有官有服本宗親一與有官有服

者之子孫凡為六等宣和二年殿中侍御史張汝舟言  
今法所該補奏與先朝同昔之官至大夫歷官不下三  
五十年而今閱三五年有已至大夫者矣諸翼將軍至  
武翼郎須出官三十年方許奏補今文武官奏補未嘗  
限年此太濫也至若中大夫以下及武功武翼大夫已  
求致仕而不及受勅乃格其恩於是有身謝而未受勅  
者其家或至匿哀湏限然不及親受而不與霑恩者多  
矣此太吝也欲自今中大夫至帶職朝奉郎以上雖遇

郊恩入官不及二十年皆未許蔭補雖已經奏薦再遇  
郊恩年仍未及者亦寢其奏庶抑其濫至於文武官及  
大夫以上嘗求休致而身謝在出勅前欲並許奏蔭以  
補其不及尚書省文武官致仕雖不及受勅若無曾受  
廕人自有遺表恩又寺監長貳至開封少尹係用職事  
蔭補不合限年餘從之崇寧以來類多泛賞如曰應奉  
有勞獻頌可采職事脩舉特授特轉者皆無事狀可名  
而直以與之孟昌齡朱勔父子童貫梁師成李邦彥等

凡所請求皆有定價故不三五年選人有至正郎或員外帶職小使臣至正副使或入遙郡橫行者而蔡京拔用從官不論途轍一言合意即日持橐又優堂吏往往至中奉大夫或換防禦觀察使由此任子百倍欽宗即位赦恩覃轉惟許宗室其文武臣止令回授有官有服親且詔非法應回授及特許者毋錄用高宗中興重定補蔭法內外臣僚子孫期親大功以下及異姓親隨文武各有等秩見職官志建炎元年詔宰執子弟以恩澤

任待制以上者並罷紹興四年詔文武大中大夫以上及見帶兩制職名依舊不限年內無出身自授官後以及十五年年及三十不係官觀責降之人聽依條補荫七年中書舍人趙思誠言孤寒之士名在選部皆待數年之闕大率十年不得一任今親祠之歲任子約四千人是十年之後增萬二千員科舉取士不與焉將見寒士有三十年不得調者矣祖宗時仕至卿監者皆實以年勞功績得之年必六十身不過得恩澤五六人厥後

私謁行橫恩廣有年未三十而官至大夫者員數比祖宗時不知其幾倍而恩例未嘗少損有一人而任子至十餘者此而不草實蠹政事望議草其弊會恩誠去國議遂寢舊法惟贓罪不許任子新令併及私罪徒有司以為拘礙者多遂罷新令又詔宰執侍從致仕遺表惟補總麻以上親母及異姓二十二年以武臣多出軍中爵秩高而族姓少凡有薦奏同姓皆期功異姓皆中表閭巷之徒附會以進命須經統轄長官結罪保明詭冒

者連坐之帝於后妃補蔭每加裁抑詔后族不得任從  
官孝宗即位思草冗官初詔百官任子遇郊恩權免奏  
薦年七十人遇郊不許奏子俄又詔未奏者許一名隆  
興元年以張宋卿言蔭補冗濫立為定法凡員外轉正  
郎正郎轉侍從卿監之至中大夫每初遇郊則聽任一  
子再經則不許復請遺表之恩各減其一減年之類亦  
去其半至府史之屬武功之等亦倣此差降之乾道三  
年詔非泛補官如宗室戚里女夫捧香異姓上書獻頌

隨奉使補官陣亡女夫異姓給使減年之類轉至合奏  
薦官候致仕與奏一名嘗奏者不再奏四年詔宗室袒  
免親諸衛將軍武功大夫至武翼郎以上遇大禮奏補  
親屬並依外官法著為令九年詔文臣帶職員外郎及  
武翼大夫以上生前未嘗奏薦者與致仕恩澤一名即  
已嘗奏薦而被蔭人身亡許再請應朝奉郎武翼郎以  
上補授及三十年者亦與一名又詔武臣嘗任執政官  
遇郊聽補文資於是恩數視執政者亦得之蓋戚里宗

王與夫攀附之臣皆爭以文資祿其子不可復正矣自  
隆興著酬賞實歷對用轉官之法遷官稍緩至是郊恩  
之奏視為減半然猶未大艾也淳熙九年始詔減任子  
員數自宰相執政侍從卿監正郎員外郎分為五等每  
等降殺以兩酌中定為止數武臣如之宰相十人執政  
八人侍從六人中散大夫至中大夫四人帶職朝奉郎  
至朝議大夫二人通減三分之一於是冗濫漸革寧宗  
慶元中立補蔭新格自使相以下有差文臣中大夫武

臣防禦使以下不許遺表推恩嘉泰初以官冗恩濫凡宗女夫授官者休舊法終身止任一子兩府使相不得以郊恩奏門客著為令

凡流外補選五省御史臺九寺三監金吾司四方館職掌每歲遣近臣與判銓曹就尚書同試律三道中者補正名理勞考三館秘閣楷書皆本司試書札中書覆試補授後以就試多懷挾傳授乃鎖院巡搜糊名凡試百司吏人問律及疏既考合格復令口誦所對以防其弊

其自叙勞績臣僚為之陳請特免口誦謂之優試得優試者率中選後遂考試百司人歲以二十人為額毋得僥倖求優試為職掌者皆限年授外州司戶勒留有至諸衛長吏兩省主事者學士審官審刑院登聞檢鼓院紀察刑獄司皆選取諸司吏人或以年限或理本司選然中書制勅及五院員闕多即遣官特試書劄驗視材質制勅院須堂後官以下親屬五院須父祖有官者樞密院亦如之惟本院試驗宣徽院三司各省閭門三班

院皆本公司名補至其首者出職凡出職者樞密院三司  
皆補借職以上餘或補州縣內廷諸司主吏三司大將  
亦有補三班借職者中書主事以下三司勾覆官以上  
各帶諸州上佐樞密院主事以上皆帶同正將軍餘多  
帶遠地司戶簿尉先是勒留出官及選限皆無定制其  
隸近司有裁三二年即堂除外官者咸平末命翰林學  
士承旨宋白與兩制御史中丞同詳定之白等請令中  
書公堂五院行首副行首依舊制補三班通引堂門直

省發勅驗使臣遇闕依名次補正名三年授勒留官遇恩則一年授後七年出官宣徽院貼房至都勾押官軍將至知客押衙各六等並以次補至勾押官押衙及五年以上出官補三班或簿尉學士院孔目官補正三年授勒留官遇恩一年授後五年出官驅使官補正四年授勒留官遇恩二年授後八年出官三館孔目官書直庫表奏守當官四年授勒留官遇恩二年授後守當官八年書直庫表奏官七年孔目官六年出職其職遷補

者許通計年考有奉錢官者更留三年典書楷書五選集準格三館入流歲數已少無得以諸色優勢減選閭門客省承受驅使官轉次第並依本司舊例補正名四年授勒留官遇恩則二年授後七年出授簿尉其行首並如舊制審刑院本無職掌名額於諸司選差正名令不以有無勒留審官五年審刑三年出官以前諸司請自今勒留並比七選集授官例赴選日不以州縣地望為資叙從之後又定客省承受行首歲滿補殿直奉職

御書院翰林待詔書藝祇候十年以上無犯者聽出職  
太祖嘗親閱諸司流外人勒之歸農者四百人開寶間  
詔流外選人經十考入令錄者引對方得注擬驅使散  
從官伎術人資考雖多亦不注擬堂後官多為姦贓欲  
更用士之在令錄簿尉選者充之或不屑就而所選不  
及數乃如舊制雍熙時以堂後官充職事官入謝外不  
赴朝參見宰相禮同胥吏端拱初以河南府法曹參軍  
梁正辭楚丘縣主簿喬蔚等五人為將作監丞充中書

堂後官拔選人授京官為堂吏自此始

宋史卷一百五十九


謹案卷一百五十八第十頁後四行並轉太祝奉

禮郎刊本郎訛部據上下文改

第二十四頁後七行而專用通仕登仕將仕三階

刊本通仕訛通事據上文改

欽定四庫全書



總校官庶吉士臣張能照

校對官庶吉士臣徐如澍

謄錄監生臣張孝基

謄錄監生臣宋昆玉

欽定四庫全書叢要

史部

宋史卷一百六十

詳校官編修臣王天祿



欽定四庫全書  
卷五千七百八十八

史部

宋史卷一百六十

元中書右丞相總裁托克托等修

選舉志第一百十三

選舉六

保任考課

保任之制銓注有格大概拘以法法可以制平而不可以擇才故予奪升黜品式具在而又責官以保任之凡改秩遷資必視舉任有無以為應否至其職任優殊則又

隨事立目往往特詔公卿部刺史牧守長官即所部所  
知揚其才識而任其能否上自侍從臺諫館學下暨錢  
穀兵武之職時亦以薦舉命之蓋不膠於法矣國初保  
任未立限制建隆三年始詔常參官及翰林學士舉堪  
充幕職令錄者各一人條析其實毋以親爲避既而舉  
者頗因緣爲姦用知制誥高錫奏請許人訐告得實則  
有官者優擢非仕宦者授以官或賞緡錢不實則反坐  
之自是或特命陶穀等舉才堪通判者或詔翰林學士

及常參官舉京官幕職州縣正員堪升朝者藩鎮奏掌  
書記多越資叙則詔歷兩任有文學方得奏又令諸道  
節度觀察使於部內官選才識優茂德行敦篤者各二  
人防禦團練使各舉一人遣詣闕廷觀其器業而進用  
焉凡被舉擢官於誥命署舉主姓名他日不如舉狀則  
連坐之太宗尤嚴牧守之任詔諸道使者察部內履行  
著聞政術尤異文學茂異者州長吏擇判司簿尉之清  
廉明幹者具名以聞驛召引對授之知縣又令閱屬部

司理參軍廉慎而明於推鞠者舉之雍熙二年舉可升朝者始令翰林學士兩省御史臺尚書省官舉之淳化元年令宰相以下至御史中丞各舉朝官一人爲轉運使迺詔曰國家詳求幹事之吏外分主計之司雖曰轉輸得兼按察總覽郡國職任尤重物情舒慘靡不由之尚慮徼功固當責實凡轉運使釐革庶務平反獄訟漕運金穀成績居最及有建置之事果利於民今歲終以聞非殊異者不得條奏又詔三司三館職事官已升擢

者不在論薦其有懷材外任未爲朝廷所知者方得奏  
舉始令內外官凡所舉薦有變節踰矩者自首則原其  
聯坐之罪太宗聽政之暇每取兩省兩制清望官名籍  
擇其有德譽者悉令舉官所舉之人湏析其爵里及歷  
任殿最以聞不得有隱如舉狀者有賞典無驗者罪之  
又嘗謂宰臣曰君子小人趨向不同君子畏慎不欺暗  
室名節造次靡渝小人雖善談忠信而履行頗僻在官  
贖貨罔畏刑罰如薛智周以侍御史守婺政以賄成聚

歛無已其土產富於羅州民謂之羅端公則爲治可知矣卿等職在掄材今令朝臣舉官已是逐末更不擇舉主何由得人也供奉官劉文質嘗入奏察舉兩浙部內官高輔之李易直艾仲孺梅詢高鼎高貽慶姜嶼戚綸八人有治迹並降璽書褒諭帝曰文質所舉皆良吏也特遷文質爲西京作坊副使咸平間祕書丞陳彭年請用唐故事舉官自代詔祕書直學士馮拯陳堯叟叅詳之極等上言從性制常參官及節度觀察防禦刺史少尹

畿赤令并七品以上清望官授訖三日內於四方館上  
表讓一人以自代其表付中書門下每官闕以見舉多  
者量而授之今官品制度沿革不同請令兩省御史臺  
尚書省六品以上諸司四品以上授訖具表讓一人自  
代於閣門授下方得入謝在外者授訖三月內具表附  
驛以聞遂著爲令真宗初屢詔舉官未立常制大中祥  
符二年詔幕職州縣官初任未閑吏事湏三任六考方  
得論薦五年始定制自翰林學士以上常參官歲各舉

外任京朝官三班使臣幕職州縣官一人著其治行所  
宜任令閣門御史臺歲終會其數如無舉狀即具奏致  
罰於冬季以差出亦湏舉官後乃入辭諸司使副承制  
崇班曾任西北邊川廣鈴轄親民者亦倣此制諸路轉  
運使副提點刑獄官知州通判奏舉部內官屬則不限  
人數具在任勞績無由可舉及顯有踰濫者亦湏指述  
不得顧避以次年二月二十五日以前到京違期則都  
進奏院以名聞論如不申考帳法三司使副舉在京掌

事京朝官使臣凡被舉者中書歲置二籍疏其名銜下  
列歷任功過舉主姓名及薦舉數一以留中書一以五  
月一日進內明年籍內仍計向來功過及舉主數使臣  
即樞密院置籍兩省尚書省御史臺官凡出使廻湏採  
訪所至及經歷隣近郡官治迹善惡以聞轉運使副提  
點刑獄官知州通判赴闕各具前任部內官治迹能否  
如隣近及所經州縣訪聞善惡亦許同奏先於閣門投  
進方得入見凡朝廷湏人才及欲理州縣弊政劇務即

籍內視舉任及課績數多而資歷相當者差委於宣勅  
內盡列舉主姓名或任內幹集特與遷秩苟不集事本  
犯雖不去官亦移閑慢僻遠地內外羣臣所舉及三人  
有成績仰中書樞密院具姓名取旨甄獎如併舉三人  
俱不集事坐罪不至去官亦仰奏裁當行責降或得失  
相參亦與折當天聖六年詔審刑院舉常參官在京刑  
法司皆爲詳議官大理寺詳斷刑部詳覆法直官皆舉  
幕職州縣曉法令者爲之自請試律者湏五考有舉者

乃聽試試律三道疏二道又斷中小獄案二道通者爲  
中格時舉官擢人不常其制國子監闕講官則詔諸路  
轉運使舉經義通明者或欲不次用人嘗詔近臣舉常  
參官歷通判無贓罪而才任繁劇者欲官諸邊要亦嘗  
詔節度使至閣門使知州軍鈐轄諸司使舉殿直以上  
材勇堪邊任者或令三司使下至天章閣待制舉奏之  
邊有警則詔諸轉運使提點刑獄舉所部官才堪將帥  
者三路知州通判縣令則詔近臣舉廉幹吏選任之母

拘資格至于文行之士錢穀之才刑名之學各因時所求而薦焉自天聖後進者頗多始戒近臣非受詔毋輒舉官又下詔風厲毋以薦舉為阿私其任用已至部使者毋得復薦失舉而已擢用聽自言不實弗為負初選人四考有舉者四人得磨勘遷京官始詔增為六考舉者五人湏有本部使者御史王端以為法用舉者兩人得為縣令為令無過謹還職事官知縣又無過謹遂得改京官乃是用舉者兩人保其三任也朝廷初無參伍

考察之法偶幸無過輒信而遷之是以碌碌之人皆得  
自進因仍弗革其弊將深乃定令被薦為令任內復有  
舉者始得遷否則如常選母輒升補時增設禁限常參  
官已授外任母得奏舉京官見任知州通判升朝官兵  
馬都監諸司副使以上及在京員外郎嘗任知州通判  
諸司副使嘗任兵馬都監者乃聽舉流內銓復裁内外  
臣僚歲舉數文臣待制至侍御史武臣自觀察至諸司  
副使舉吏各有等數母得輒過而被舉者湏有本部監

司長使按察官乃得磨勘又限到官一考方得薦知雜御史觀察使以上歲舉京官不得過二人其常參官毋得復舉自是舉官之數省矣定監司以所部州多少劇易之差為舉令數非本部勿舉其後又增舉主三員蓋官冗之弊浸極故保薦之法大抵初畧而後詳也英宗時御史中丞賈黯又言令京朝官至卿監凡一千八百餘員而吏部奏舉磨勘選人未引見者至二百五十餘人且以先朝事較之方天聖中法尚簡選人以四考改

官而諸路使者薦部吏未有限數而在京臺閣及常參  
官嘗任知州通判者雖非部吏皆得薦時磨勘改官者  
歲才數十人後資考頗增而知州薦吏視屬邑多少裁  
定其數常參官不許薦士其條約漸繁而改官者固已  
衆矣然引對猶未有待次者也皇祐中始限監司奏舉  
之數其法益密而磨勘待次者已不減六七十人皇祐  
中今纔十年耳而猥多至於三倍向也法疏而其數省  
今也法密而其數增此何故哉正在薦吏者歲限定員

務充數而已如郡守歲許薦五人而歲終不滿其數則人人以為遺已當舉者避謗畏議欲止不敢此所以多而真才實廉未免恩於無能也宜明詔天下使有人則薦不必滿所限之數天子納其言下詔申勅中外臣僚歲得舉京官者視元數以三分率之減一分舉職官有舉者三人任滿選如法所以分減舉者數省京官也判吏部流內銓蔡抗又言奏舉京官人度二年引對乃可畢計每歲所舉無慮千九百員被舉者既多則磨勘者

愈衆且今天下員多闕少率三人而待一闕若不稍改  
除吏愈難臣以為可罷知雜御史觀察使以上歲得舉  
官法從之自是舉官之數彌省矣故事初入二府舉所  
知者三人將以觀大臣之能後來請謁之說勝而薦者  
或不以公四年詔中書樞密院舉人皆明言才業所長  
堪任何事以副朕為官擇人之意神宗即位乃罷兩府  
初入舉官凡薦任之法選人用以進資改秩京朝官用  
以升任舊悉有制熙寧後又從而損益之故舉皆限員

而歲又分舉制益詳矣定十六路提點刑獄歲舉京官縣令額又詔察訪使者得舉官選人任中都官者舊無舉薦始許其屬有選人六員者歲得舉三員既而帝以舊舉官往往緣求請得之乃革去奏舉而概以定格詔內外舉官法皆罷令吏部審官院參議選格元祐初左司諫王巖叟言自罷辟舉而用選格可以見功過而不可以見人材中外病之於是不得已而別為之名以用其平日之所信故有踏逐申差之目踏逐實薦舉而不

與同罪且選才薦能而謂之踏逐非雅名也况委人以  
權而不容舉其所知豈為通術遂復內外舉官法及司  
馬光為相奏曰為政得人則治然人之才或長於此而  
短於彼雖臯夔稷契各守一官中人安可求備故孔門  
以四科論士漢室以數路得人若指瑕掩善則朝無可  
用之人苟隨器授任則世無可棄之士臣備位宰相職  
當選官而識短見狹士有恬退滯淹或孤寒遺逸豈能  
周知若專引知識則嫌於私若止循資序未必皆才莫

若使有位達官各舉所知然後克叶至公野無遺賢矣  
欲乞朝廷設十科舉士一曰行義純固可為師表科官有無官人皆可舉二曰節操方正可備獻納科官有舉有三曰智勇過人可備將帥科官有文武舉人四曰公正聰明可備監司科官有舉人皆可舉五曰經術精通可備講讀科官有無官人皆可舉六曰學問該博可備顧問科官有舉人皆可舉七曰文章典麗可備著述科官有舉人皆可舉八曰善聽獄訟盡公得實科官有舉人皆可舉九曰善治財賦公私俱便科官有舉人皆可舉十曰練習法令能斷請讞科官有應職事官

自尚書至給舍諫議寄祿官自開府儀同三司至太中  
大夫職自觀文殿大學士至侍制每歲湏於十科內舉  
三人仍具狀保任中書置籍記之異時有事湏材即執  
政案籍視其所嘗被舉科格隨事試之有勞又著之籍  
內外官闕取嘗試有效者隨科授職所賜誥命仍備所  
舉官姓名其人任官無狀坐以繆舉之罪所貴人人重  
慎所舉得才光又言朝廷執政惟八九人若非交舊無  
以知其行能不惟涉循私之嫌兼所取至狹豈足以盡

天下之賢才若採訪毀譽則情偽萬端與其聽遊談之言曷若使之結罪保舉故臣奏設十科以舉士其公正聰明可備監司誠知請屬挾私所不能無但有不如所舉譴責無所寬宥則不敢妄舉矣詔皆從之二年殿中侍御史呂陶言郡守提封千里生聚萬衆所係休戚而不察能否一以資格用之凡再為半刺有薦者三人則得之矣不公不明十郡而居三四是天下之民半失其養請令內外從歲舉可為守臣者各三人略資序而採

公言庶其可以擇才芘民也詔內外待制太中大夫以上歲舉再歷通判資序堪任知州者一人籍于吏部遇三路及一州而四縣者其守臣有闕先差本資序人次案籍以所薦者填之侍御史韓川言近太中大夫以上歲舉守臣而薦所不及雖課入優等皆未預選此倚薦以為信也然太中大夫以上率在京師惟馳騁請求因緣宛轉者常多得之迹遠地寒雖歷郡久治狀著課入上考偶以無薦則反在通判下不許入三路及四縣州

且州以縣之多少而分簡劇亦未為盡益繁簡在事不在縣固有縣多而事不繁亦有縣少而事不簡者願參以考績之實著為通令仍不以縣之多少而為簡劇詔吏部立法以聞已而歲舉積久吏部無闕以授四年遂罷太中大夫以上歲舉法惟奉詔乃舉焉紹聖元年右司諫朱勃言選人初受任雖能法未得舉為京官而有挾權善請求者職官縣令舉員既足又併改官舉員求之詔歷任通及三考而資序已入幕職令錄方許舉之

改官初神宗罷薦舉惟舉御史法不廢熙寧二年王安石言舉御史法太密故難於得人帝曰豈執政者惡言官得人耶於是中書悉具舊法以奏安石曰舊法凡執政所薦即不得為御史執政取其平日所畏者薦之則其人不復得言事矣蓋法之弊如此帝乃令悉除舊法一委中丞舉之而稍略其資格趙抃曰用京官恐非體又不委知雜專任中丞亦非舊制帝曰唐以布衣馬周為之用京官何為不可知雜屬也委長為是侍御史劉

述奏曰舊制舉御史必官升京朝資入通判衆學士本臺丞知雜更互論薦每一闕上二人而擇用一人今專委中丞則愛憎由己公道廢於私恩或受權臣之託引所親厚擅竊人主威福此大不便弗聽既改法著作佐郎程顥王子韶謝景福方為條例司屬官中丞呂公著薦之遂以太子中允權監察御史裏行宣仁太后聽政詔范純仁為諫議大夫唐叔問蘇轍為司諫朱光庭范祖禹為正言章惇曰故事諫官皆薦諸侍從然後大臣

稟奏令得無有近習援引乎太后曰大臣實皆言之非  
左右也惇曰臺諫所以糾大臣之越法者故事執政初  
除苟有親戚及嘗被薦引者見為臺臣則皆他徙防壅  
蔽也今天子幼冲太皇太后同聽萬幾故事不可違於  
是呂公著以范祖禹韓績司馬光以范純仁皆避親嫌  
光曰純仁祖禹實宜在諫列不可以臣故妨賢寧臣避  
位惇曰績光公著必不私他日有懷姦當國者例此而  
引其親黨蔽塞聰明恐非國之福純仁祖禹請除他官

仍令侍從以上各得奏舉於是詔尚書侍郎給舍諫議中丞待制各舉諫官二員純仁改除天章閣待制祖禹爲著作佐郎後又命司諫正言殿中侍御史監察御史並用升朝官通判資序元祐六年御史中丞鄭雍言舊御史闕臺官得自薦所以正名舉職也自官制行御史中丞與兩省分舉而今之兩省官屬皆與聞門下中書政事其自舉非故事且有嫌乞專委臺官若稍涉私自有點典詔御史中丞舉殿中侍御史二員翰林學士中

書舍人同舉監察御史二員給事中亦舉二員雍又言  
風憲之地責任宜專若臺屬多由他薦恐非責任之本  
意詔中丞更舉監察御史二員八年侍御史楊畏言風  
憲之任人主寄耳目焉御史進用宰執不得預顧令兩  
省屬官舉之非是遂寢前命武臣薦舉立格有枚別職  
任而舉之者有概名材武而入之銓格者又其上則謀  
略膽勇可備統衆諳練兵事可任邊寄之類惟邊要任  
使隸樞密院餘則審官西院三班院按格注之其後雖

時有更易而薦舉之所重輕選用之所隸屬多規此立制建炎兵興多事以中外有文武材略出倫或淹布衣或沉下僚命侍從監司郡守搜訪各舉所知州縣禮遣赴行在又詔舉忠信寬博可使絕域與智謀勇毅能將萬衆者不以有無官資並詣登聞檢院自陳才謀勇略可使者赴御營司量才錄用或命庶僚各舉内外官及布衣隱士才堪大用者擢為輔弼協濟大功或命侍從舉可為臺諫者或舉縣令或舉宗室刺史舉忠義之士

能恢復土疆保護王室者師臣監司守令舉所部見任  
寄居待次文武官有智謀及武藝精熟者及訪求國初  
功臣後裔中興以來忠義死節之家子孫四年以朝班  
多闕詔臺諫左右司郎官以上各薦士二人仍令執政  
同選在外侍從雖在謫籍無大過而政事才學實可用  
者亦與召擢紹興二年廷臣言今右武之世雖二三大  
將各立雋功微賤之中尚多奇士願廣加薦舉延問恢  
復之計帝然其言詔觀察使以上各薦可為將帥者二

人樞密籍錄以備選用又以中原士大夫隔絕滋久流徙東南者媒寡援疎多致沉滯令侍從搜訪以聞三年復司馬光十科時遣五使宣諭諸道令訪廉潔清脩可以師表吏民者尋詔宣諭官所薦並俟終更令入對升擢以勸能吏復用舊制侍從官受命三日舉官一員自代中書門下省籍記姓名每闕官即以舉狀多者進擬內外武臣舉忠勇智略可自代者一人如文臣法五年命自監察御史至侍從官舉曾經治縣聲績顯著者為

監司郡守不限員數遇闕選除才堪大縣者通舉二十人不限資序十年以南渡後人材萃於兩浙而屬吏薦員甚狹增部使者薦舉改官之額歲五員十四年命守臣終更入見各舉所部縣令一人二十二年右諫議大夫林大鼐言國初常參官皆得舉人不限内外亦無員數南渡之初恩或非泛人得僥倖有從軍而改秩者有捕盜而改秩者有以登對而改秩者今朝廷無事謹惜名器惟薦舉一路貪躁者速化廉靜者陸沉今欲取考

第員數增減以便之增一任者減一員十考者用四十  
二考者用三十五考者用二如減舉法湏實歷縣令不得  
仍請獄司其或負犯殿選自如常坐士有應此格者  
行無玷缺年亦蹉跎無非孤寒老練安義分之士望付  
有司條上以弭奔競二十五年命侍從舉知州通判治  
跡顯著者以補監司之闕仍保住終身犯贓及不職與  
同罪二十九年聞人滋又請凡在官歷任及十考以上  
無公私罪雖舉削不及格許降等升改或疑其太濫則

取吏部累年改官酌中之數立為限隔舉狀年勞參酌  
並用於是下其議中書舍人洪遵給事中王晞亮等上  
議曰本朝立薦舉之法必使歷任六考所以遲其歲月  
而責其赴功必使之舉官五員所以多其保任而必其  
可用今如議臣所請則有力者惟圖見次無材者苟冀  
終更出官十餘年可以坐待京秩此不可一也今欲減  
改官分數以待無舉削者則當被舉之人必有失職淹  
滯之歎此不可二也京官易得馴至郎位任子之恩愈

不可減非可以救入流之弊此不可三也夫祖宗之法  
非有大害未易輕議今一旦取二百年成法而易之此  
不可四也臣以為如故便滋議遂寢三十年以武臣被  
薦者衆命內外大臣所舉統制統領官各遷一秩將官  
以下所舉者令兩府籍記右正言何溥言比命侍從薦  
舉縣令如聞選人不可授大邑止籍記姓名夫論人才  
不拘資格豈堪為縣令而有小大之別乎今所舉者才  
也非官也願無拘劇易早與選除歲一行之十年之後

天下多賢令矣乃詔薦舉守令遇見闕依次除授如已  
授差遣者任滿取旨帝謂輔臣曰朕有一人材簿臣下  
有所薦揚退則記其姓名遇有選用搜而得之無不適  
當孝宗嘗命內外選在任閒居待次官舉可任監司郡  
守之人以資序分二等一見今可任一將來可任注籍  
于三省仍作圖進呈以憑除擢又以武選之衆拔擢未  
廣立謀略沉雄可任大計寬猛適宜可使御衆臨陣驍  
勇可鼓士氣威信有聞可守邊郡思智精巧可治器械

凡五等科目令曾歷軍功觀察使以上各舉二人其通  
習典章可掌朝儀練達民事可任郡寄諳曉財計可裕  
民力持身廉潔可律貪鄙詞辯不屈可備奉使五等令  
非軍功觀察使以上舉之並隨類指陳實迹毋得別撰  
褒詞隆興二年廷臣上言謂國朝視文武為一體故有  
武臣以文學換授文資文臣以材略智謀換右職當邊  
寄者蓋文武兩途情本參商若文臣總幹戎事不換武  
階則終以氣習相忌有不樂從者矣今兵塵未息方厲

恢復之圖願博采中外有材智權略可以臨邊可以制  
閫者倣舊制改授從之乾道以後又選大將之家能世  
其武勇者武舉及第武藝絕倫可為將佐者會廷臣言  
曰方今國家之兵東至淮海西至川蜀殆百餘萬其間  
可為將帥者不在其上則在其下而朝廷未知振其氣  
表其才也今文臣有三人舉主則為之循資再任五人  
則為之改秩而武臣無有焉古語曰三辰不軌擢士為  
相蠻夷不恭拔卒為將宜令都統制視監司者歲舉武

臣二人視郡守者歲舉一人以智勇俱全為上善撫士  
卒專有膽勇者次之不拘將校士卒優以獎擢被舉人  
有臨戰不用命者與文臣犯入已贓者同併坐舉主帝  
可其奏仍著為法三年禮部尚書趙雄請令侍從臺諫  
兩省於知縣資序以上歲薦堪充郡守通判資序以上  
歲薦監司仍用漢朝雜舉之制三省詳加考察詔如所  
請仍不以內外雜舉歲各五人保舉官及五員以上列  
銜共奏帝曰薦舉本欲得人又恐干請反長奔競冀茂

良言三代良法亦不免於弊今欲精選監司郡守非薦舉何由知之帝曰若今雜舉則雖衆論僉允又經中書考察而後除授亦博采遴選之道也吏部請武舉軍班武藝特奏名出身并任巡檢駐泊監押知砦比附文臣關升條令並實歷六考有舉主四人內監司一人聽關升親民正副將兩任有舉主二人內一人監司亦與關升凡升副將視文臣初任通判資序再關升正將視文臣次任通判資序關升路分副都監視文臣初任知州

資序小郡州鈐轄視文臣次任知州資序孝宗以歲舉京官數濫於是內外薦舉改官員數六部寺監長貳戶部右曹郎官等三分減一禮部國子監長貳如上條外又減半前宰執歲各減二員諸道轉運提刑提舉常平茶鹽學事司總領茶馬鑄錢司安撫制置司及諸路州軍並四分減一通籍之數彌省矣光宗時言者謂被薦者衆朝廷疑其私而不信病其泛而難從縱有賢才不免與僥倖者併棄請條約之乃命帥守監司毋獨員薦

士時薦舉固多得人然有或乏廉聲而舉充廉吏或素昧平生而舉充所知或不能文而舉可備著述遂命臣僚自今有人則薦無人則闕其尤謬妄者覺察之嘉泰二年令內外舉薦並具實跡以聞自是監舉之弊稍革嘉定十二年命監司守臣舉十科政績所知自代露章列薦並籍記審察任滿則取其舉數多有政績行誼者升擢之宋初內外小職任長吏得自奏辟熙寧間悉罷歸選部然要處職任如沿邊兵官防河捕盜重課額務

場之類尋又立專法聽舉於是辟置不能全廢也既出常格則憲人往往因之以行其私元祐以來屢行屢止蓋處心公明則得以用其所知固為良法苟循私昧理則才不為用請屬賄賂無所不有美又孰若付之銓曹而概以公法者哉建炎初詔河北招撫河東經制及安撫等使皆得辟置將佐官屬行在五軍并御營司將領亦辟大小使臣諸道郡縣殘破之餘官吏解散諸司誘人填闕皆先領職而後奏給付身於是州郡守將皆假

軍興之名換易官屬有罪籍未叙復守選未參部者朝論患之乃令釐正使歸部依格注擬惟陝西五路兩河兩淮京東等路經略安撫司屬官聽舉辟餘路並罷四年初置諸鎮撫使管內州縣官並許辟置言者謂遠方之民理宜綏撫如峽州四縣多用軍功或胥吏補知縣欄吏補監稅民被其害遂命取峽州江陵府荊門軍公安軍州縣官闕委安撫司奏辟命御史臺仍舊辟舉承務郎以上官充主簿檢法官不限資序紹興二年臣僚

又以比年帥守監司辟官攬奪部注朝廷不能奪銓曹  
不能違又多畀以添差不釐務之闕上自監司倅貳下  
至掾屬給使一郡之中兵官八九員一務之中監當六  
七員數倍於前日存無事之官食至重之祿所以重困  
生民請裁省其闕否則以宮廟之祿畀之遂命自今已  
就辟差理資任者毋得據舊闕以防下次六年詔諸道  
宣撫司僚屬許本公司奏辟內京官以二年為任願留再  
任者取旨自兵興所辟官有經十年不退者故條約焉

二十六年詔已注知縣縣令不許奏辟孝宗初詔內外  
有專法辟闕並仍舊乾道九年命監司帥臣非有著令  
不得創行奏辟所辟毋得攬已差之闕違者御史臺察  
之淳熙三年命自今極邊知縣縣令闕官專委本州守  
臣奏辟毋得仍舊權攝其見攝官留意民事百姓愛服  
者許不以有無拘礙特行奏辟七年詔未中銓未歷任  
初改秩人毋得差辟著為令理宗寶慶三年以廣南東  
西路通判幕職教授等官法未嘗許辟者湏於各官將

滿之前具闕如未有代者即聽申部出闕滿三月無人  
注擬申省下本路通判以下京官闕從諸司奏辟選人  
闕從漕司定差作邑未滿三年作倅未滿二考不許預  
期奏辟他闕諸司屬官不許輕自辟置或久闕正官許  
令次官暫攝侍朝命方許奏辟淳熙十一年以御史臺  
申嚴銓法禁監司郡守辟親戚為屬吏又選人無考第  
舉主不及三員及納粟人雖有考第舉主並不聽辟為  
令寶祐三年戒諸路監司帥閫不應辟而輒辟者辟主

及受辟之官並與鐫秩

考課宋初循舊制文武常參官各以曹務間劇為月限  
考滿即遷太祖謂非循名責實之道罷歲月叙遷之制  
置審官院考課中外職事受代京朝官引對磨勘非有  
勞績不進秩其後立法文臣五年武臣七年無贓私罪  
始得遷秩曾犯贓罪則文臣七年武臣十年中書樞密  
院取旨其七階選人則考第資歷無過犯或有勞績者  
遞遷謂之循資凡考第之法內外選人周一歲為一考

欠日不得成考三考未替更周一歲書為第四考已書之績不得重計初著令州縣戶口準見戶十分增一刺史縣令進考若耗一分降考一等建隆三年又以科賦有欠踰十之一及公事曠違嘗有制受罰者皆如耗戶口降考吏部南曹又舉周制請州縣官益戶增稅受代日並書於籍凡千戶以下能增百戶減一選減及三選以上令賜章服主簿升秩進階能歸復逋亡之民者亦如之是年縣始置尉頒捕盜條給以三限限各二十日

三限內獲者令尉等第議賞三限外不獲尉罰一月奉  
令半之尉三罰令四罰皆殿一選三殿停官令尉與賊  
鬪而能盡獲者賜緋升擢乾德四年詔諸縣令佐有能  
招擣勸課以致蕃庶民籍租額出其元數減一選仍進  
一階太宗勵精圖治遣官分行郡縣廉察官吏河南府  
法曹參軍高丕等皆以不勝任免官復詔諸道察舉部  
內官第其優劣為三等政績尤異為上職務粗治為中  
臨事弛慢所蒞無狀者為下歲終以聞先是諸州掾曹

及縣令簿尉皆戶部南曹給印紙歷子俾州郡長吏書其績用愆過秩滿送有司差其殿最詔有司申明其諸州別給公據者罷之判吏部南曹董淳言有司批書印歷多所闕略令漏書一事殿一選三事降一資自是職事官依州縣給南曹厯子天下知州通判京朝官釐務於外者給以御前印紙令書課績時蔣元振知白州為政清簡民甚便之秩滿衆輒詣部使乞留凡十有八年未受代姚益恭清白有才幹知鄆州湏城縣鞭朴不施

境內大治淳化初採訪使各言其狀下詔褒嘉賜元振  
絹三十四匹粟五十石賜益恭對衣銀帶絹五十匹四年  
始分置磨勘之司審官院掌京朝官考課院掌幕職州  
縣官廢差遣院令審官總之乃詔郡縣有治行尤異吏  
民畏服居官廉恪蒞事明敏鬪訟衰息倉廩盈羨寇盜  
剪滅部內清肅者本道轉運司各以名聞當驛置赴闕  
親問其狀加旌賞焉其貪冒無狀淹延鬭訟踰越憲度  
盜賊競起部內不治者亦條其狀以聞當行貶斥以翰

林學士錢若水樞密直學士劉昌言同知審官院考覆功過以定升降又以判流內銓翰林學士蘇易簡知制誥王旦等知考課院重其職也凡流內銓主常調選人考課院主奏舉及歷任有殿最者明年帝親選京朝官三十餘人自書戒諭之言于印紙曰勤政愛民奉法除姦方可書為勞績且謂錢若水曰奉法除姦之言恐諸臣未喻因而生事可語之曰除姦之要在乎奉法至道初罷考課院併流內銓二年遣使廉察諸道長吏得八

人莅事公正惠愛及民皆降璽書獎諭真宗即位命審  
官院考京朝官殿最引對遷秩京朝官引對磨勘自此  
始先是每恩慶百僚多得序進帝始罷之惟郊祀恩許  
加勲階爵邑帝察羣臣有聞望者得刑部郎中邊肅等  
二十有四人令閣門再引對觀其辭氣文藝並得優升  
景德初令諸道辨察所部官吏能否為三等公勤廉幹  
惠及民者為上幹事而無廉譽清白而無治聲者為次  
畏懦貪猥為下仁宗尤矜憐下吏以銓法選人有私罪

皆未聽磨勘諭近臣凡門謝弗至與對數失儀其母以為罪又曰州縣秩卑而長吏多鈞撫細故文致之法使不得自進朕甚憫焉宰相王曾曰引對時陛下酌其輕重而稍擢之則下無滯才矣其後選人有束鹿縣尉王得說歷官寡過書考最多而無保任者帝察其孤貧特擢為大理寺丞天聖時詔文武臣僚非有勲德善狀不得非時進秩非次罷免者母以轉官帶職為例兩省以上舊法四年一遷官今具履歷聽旨京朝官磨勘年限

有私罪及歷任嘗有罪先以情重輕及勤績與舉者數奏聽旨若無私犯而著最課及有舉者皆第遷之自請釐物務于京師五年一磨勘因舉及選差勿拘凡有善政異績準事大小遷升選人視此又定監物務入親民次升通判通判升知州皆用舉者舉數不足毋輒闕升慶厯三年從輔臣范仲淹等奏定磨勘保任之法自朝官至郎中少卿湏清望官五人保任始得遷其後知諫院劉元瑜以為適長奔競非所以養廉恥乃罷之八年

詔近臣論時政翰林學士張方平言祖宗之時文武官不立磨勘年歲不為升遷次序有才實者從下位立見超擢無才實者守一官十餘年不轉其任監當或知縣通判知州至數任不遷當時人皆自勉非有勞効知不得進祥符之後朝廷益循寬大自監當入知縣知縣入通判通判入知州皆以兩任為限守官及三年例得磨勘先朝始行未見有弊及今年深習以為常皆謂分所宜得無賢不肖莫知所勸願陛下稍革此制其應磨勘

叙遷必有勞績或特勅擇官保任者即與轉遷如無勞  
績又不因保任者更增展年其保任之法須選擇清望  
有才識之人命之舉官如此則是執政之臣舉清望官  
委清望官舉親民官凡官有闕惟隨員數舉之庶見急  
才愛民之意嘉祐六年下詔曰朕觀古者治世牧民之  
吏多稱其職而百姓安其業今求材之路非不廣責善  
之法非不詳而吏多失職非稱所以為民之意豈人材  
獨少而世變殊哉殆不得久於其官故也蓋智能材力

之士雖有興利除害禁奸勸善之意非假以歲月則亦  
媿不為用欲終厥功其路無由自今諸州縣守令有清  
白不擾政迹尤異而實惠及民者本路若州連書同罪  
保舉將政迹實狀以聞中書門下察訪得實許令再任  
英宗治平三年考課院言知磁州李田再考在劣等降  
監淄州鹽酒稅務坐考劣降等自田始考績舊審定殿  
最格法自發運使率而下至於知州皆歸考課院專以  
監司所第等級為據至考監司則總其甄別部吏能否

副以採訪才行合二事為課悉書中等無高下神宗即位凡職皆有課凡課皆責實監司所上守臣課不占等者展年降資而治狀優異者增秩賜金帛以璽書獎勸之若監司以上則命御史中丞侍御史考校凡縣令之課以斷獄平允賦入不擾均役屏盜勸課農桑賑恤饑窮道脩水利戶籍增衍整治簿書為最而德義清謹公平勤恪為善參考治行分定上中下等至其能否尤殊絕者別立優劣二等歲上其狀以詔賞罰其入優劣者

賞罰尤峻繼又令一路長吏無甚臧否不湏別為優劣  
二等止因上中下三等區別以聞是時內外官職各從  
所隸司以考覈而中書皆置之籍每歲竟或有除授則  
稽差殿最取其尤甚者而進退之熙寧五年遂罷考課  
院間遣使察訪所至州縣條其吏課凡知州通判上中  
書縣令上司農各注籍以相參考惟侍從出守郡聽不  
以考法朝廷察其治焉元豐元年詔因勞効得酬賞皆  
分五等有司受其等而差進之初一等京朝官大小使

臣皆轉一官選人資歷深者改京朝官資淺者循兩資  
次二等隨其官高下升資或減磨勘年惟軍功捕盜皆  
得改次等京朝官自三等以下賞以差減若一人而該  
兩賞許累計其等以遷三年詔御史臺六察按官以所  
糾劾官司稽違失職事多寡為殿最中書置簿以時書  
之任滿取旨升黜元祐初御史中丞劉摯言近者朝廷  
主察名實行綜覈之政下乃承之以刻主行教化擴寬  
洪之澤而下乃為苟簡先此追罪監司數人為其掊歛

害民耳而昧者矯枉過正乃欲以緩縱委靡為安靜請  
申立監司考績之政以常賦登耗郡縣勤惰刑獄當否  
民俗休戚為之殿最歲終用此以誅賞之文彥博又奏  
唐六典所載以德行才用勞效三類察在選之士參辯  
能否今之選格特多舉主有軍功斯為上矣然舉主可  
求軍功或妄何可盡據請委吏依倣三類第其才德功  
效送中書門下覆驗取其應選者引對而去留之詔令  
近臣議議者請用元豐考課令第為高下以行升黜歲

毋過五人後改立縣令課有四善五最之目及增損監司轉運課格守令為五等減磨勘法初元祐嘗立吏戶刑三部郎官課崇寧間言者乞倣周制歲終委省寺監六曹之長各考其屬稽其官成而三年遂校其勤惰行賞罰焉大觀元年詔國家休養生民垂百五十年生齒日繁而戶部民籍曾不加益州縣於進丁入老收落失實以故課役不均皆守令弛職可申嚴考課法然其考法因時所尚以示誘抑若勸學墾田植桑棗賑貸葬枯

興發坑治奉詔無違誘進道徒賦稅趣辦能按職吏皆因事而增品目舊法固不易也但奉行不皆良吏以請謁移實者亦多紹興二年初詔監司守臣舉行考課之法時郡縣數罹兵燹又命以戶口增否別立守令課分上中下三等每等分三甲置籍守倅考縣令監司考知州考功會其已成較其優劣而賞罰之五年立縣令四課曰糾正稅籍團結民兵勸課農桑勸勉孝悌三歲就緒者加旌賞無善狀者汰之臣僚上言守令之治其略

有七一曰宣詔令二曰厚風俗三曰勸農桑四曰平獄  
訟五曰理財賦六曰興學校七曰實戶口得人則七者  
皆舉今之監司實古刺史比年守令姦貪監司未嘗按  
發玩弛之弊日甚而戶部侍郎張致遠亦言之乃下詔  
戒飭監司考察守令而舉按焉頃之有請令江淮官久  
任而課其功過者帝曰朕昔為元帥時見州縣官以三  
年為任猶且一年立威信二年守規矩三年則務收人  
心以為去計今止以二年為任雖有葺治之心蓋亦無

暇矣可如所奏是時歲以十五事考校監司取四善四最考校縣令違限不實者有罪又詔監司一歲再具所部知縣有無善政顯著繆懦不職上之省十三年詔淮東京西路州縣逐考批書若增添戶口勸課農桑增修水利歲終委監司覆實比較守臣之條有九通判之條十有四令佐而下有差二十五年以州縣貪吏為虐監司郡守不訶察遂命監司按郡守之縱容臺諫劾監司之失察而每歲校其所按之多寡以為殿最之課二十

七年校書郎陳俊卿言古人各守一官終身使易地而居未必盡其能也今監司帥守小州換大州東路易西路朝廷百執事亦往往計日待遷視所居之官有如傳舍望令有政術優異者或增秩賜金或待終秩而後遷使久於其職察其勤惰而升黜之庶幾人安其分而萬事舉矣詔三省行之隆興元年命湖南北路應守令增開田疇自一千頃以下轉磨勘有差虧者展磨勘降名次二年詔淮南川陝京西邊郡守令能安輯流亡勸課

農桑首就緒者本道監司以聞乾道二年廷臣上言國朝盛時有京朝官考課有幕職州縣官考課其後為審官院為考課院皆中書或兩制臣僚校其能否以施賞罰望遵故事應監司郡守朝辭日別給御前厯字如薦賢才為幾人若為治錢穀若為理獄訟興某利除某害合為條目使之匪勉從事每考令當職官吏從實批書代還使籍手陸見然後詔執事精加考覈其風績有聞者優與增秩所蒞無狀者罰之無赦則賢者効職而中

下之才亦皆強於為善矣帝乃命經筵官參照累朝考課之法講而行之淳熙二年因臣僚言沿邊七路每路以文臣一人充安撫使以治民武臣一人充都總管以治兵分舉其職各奏其功任必加九歲考優劣一年視其規畫二年視其成效三年視其大成重議誅賞臧否分為三等治效顯著者為臧貪刻庸繆者為否無功無過者為平時天子留意黜陟諸道莫敢不奉承於是得實者皆增秩升擢而監司牧伯舉按稽緩者輒降黜行

之十餘年不免有弊帝因諭輔臣曰臧否亦有喜怒之私如諸司以為臧一司以為否必從衆為公亦在精擇監司而以臺諫考察之庶乎其可也光宗初詔罷其令寧宗以郡國按刺多徇私情遂倣舊制於御史臺別立考課一司歲終各以能否之實聞于上以詔升黜其貪墨昏懦致臺諫奏劾者坐監司郡守以容庇之罪度宗咸淳三年命參酌舊制凡文武官一是以公勤廉恪為主而又職事修舉斯為上等公勤廉恪各有一長為中

等既無廉聲又多繆政者考下等其要則以御史臺總  
帥閫鹽司監司總守倅守倅總州縣屬官餘如戎司及  
屯司軍大壘則總之制司或無制司則併各郡總管鈐  
轄並總於帥司或以逐路所部州郡多寡之數分隸轉  
運提舉提刑三司守倅月一考州縣屬官監司會所隸  
守倅制司會戎司軍壘遵照舊制互用文移會其兵甲  
獄訟金穀之數及各司屬官書擬公事拘榷錢物招軍  
備器之數次月置冊各申御史臺上之課籍俟至半年

類考較前三年定為三等中者無所賞罰上者或轉官  
或減磨勘下者降官展磨勘各有等差

宋史卷一百六十

謹案第十頁前八行豈能周知刊本周訛用據監

本改

第三十四頁前六行朕昔為元帥時刊本朕訛族  
本紀高宗嘗為天下兵馬大元帥今據改





總校官庶吉士臣張能照  
校對官庶吉士臣徐如澍  
謄錄監生臣陳增